

# GALESIYA

## Pol Galesiya Biynimb Kuyip Minj Tikak

### Minim Nind Niņep

Pol Galesiya biynimb kuyip minj tikak ak, nind am Jiwda gok sek, Jiwda mer gok sek kuyip Jiysis minim tep ak aņgñak. Kisen Jiwda biynimb kun okok gunap aņgyak, “Nimb Jiwda mer gok Mosis aņgek, chin Jiwda biynimb kilrimey gipun rek kunep gem, Gor nimbip dinyaņgamb aņgyak.” Minim yesek aņgyak kun ak Pol niņek tep ma gak. Kiyk Jiysis Krays chinup di Nop yip jimñiy ayip minim ak kirgiy, apyap pikniņgiy rek ayek niņiy, kuyip minj kun biy tikak.

### Minim Ar Keykey Mindip Rek:

Minim nind aņgak ak mindip, chapta 1:1-10.

Gor nep aņgek Pol bi Jiysis minim tep dand amemb woņg gak minim ak mindip, chapta 1:11–2:21.

Gor biynimb gok kuyip simb niņimb rek dip; nup tap bap gey kuyip dinimuņ rek ma ayip minim ak mindip, chapta 3:1–4:31.

Krays chinup kalambis rek mindonuk tungasik dak minim ak sek, Gor Kawnan gos ñinimuņ ar ak nep giyिņg, penpen direp gep minim ak sek mindip, chapta 5:1–6:10.

Minim aņg jiwneņg aņgak minim ak mindip, chapta 6:11-18.

**1** <sup>1</sup>Yand Pol, bi Jiysis minim dand amemb ak mindpiyn. Pen woņg gipiyn kun ak, biynimb gunap aņgey akaņ, gos yand key niņiy ma gipiyn; Jiysis Krays sek, Nop nup gek tikjakak ak sek kiyk apiymiyaņ nep aņger gipiyn.

<sup>2</sup>Chin mam ay Krays ker mindpun akniy, nimbip mam ay Krays ker Galesiya propens mindpim gok, “Nimb mindpim?” aspun.

<sup>3</sup>Bapiy yomb chin apiymiyaņ ak nimbip simb niņiy kond minder, mindrep ginimimb. <sup>4</sup>Tap siy tap timey gach ak, chinup pisnep timey ginimuņ rek ayek, Nop Niņuk nup ginimuņ aņgak rek, chinup di Nop yip

jimñining kumek mey, biynimb tap siy tap timey giyinq nep mindpay gok yip, yiwur yomb ma dinqambun. <sup>5</sup>Kun ak Nop nup yimb ak, pernep dand aranjun. Tep.

### Jiysis Chinup Angiy Kumak Minim Tep Ak Nep Ninjun

<sup>6</sup>Yand gos kuñay yimb niñsiyiyn. Gor chinup simb niñiy Jiysis nup anggek, chinup nen kumak ak pen, per mindiy mer; minim tep kun ak kirgiy, minim kisen dand wiyak bap key niñning gispim. <sup>7</sup>Minim kun ak, Jiysis Krays minim tep ak mer: yikop biynimb gunap apiy, minim yesek ak nimbip anggey, niñning gispim. <sup>8</sup>Krays minim tep nimbip angñinuk ak, minim niñind yimb ak angñinuk. Pen chin key akañ, enjol semb biyoñ nimb gunap apiy, minim yesek okok nimb gunap yingong giy angningambun ak, mon key yinjav ak amning, mey kun angningambun. <sup>9</sup>Minim kun ak nimbip tip aspiyn. Bi gunap ap nimbip minim yesek okok nimb gunap yingong giy angningambay ak, mon key yinjav ak amningiy.

<sup>10</sup>Yimb yip ak dand aranyañ angiy ma aspiyn; Gor nup yimb ak dand aranyañ angiy aspiyn. Biynimb gok yip kindik giyañ angiy ma aspiyn. Yenen, yand kun giy apnip ak; bi minim yesek anggep bap rek mindiy; Krays nup woñg giñemb bi ak ma mindembinip.

### Gor Pol Nup Dek Woñg Nup Ak Giyinqip

<sup>11-12</sup>Mam ay sikop. Yand nimbip niñind aspiyn. Minim tep nimbip angnik ak, biynimb nep anggey niñiy akañ, gos yand key niñiy ma angnik; Jiysis Krays yip gos ñek, nimbip angñinik.

<sup>13-14</sup>Pen yand giyinqipiyn ar ak, nimb niñbim. Jiysis nup minim ak ma diy, basind sikop minim ak diy, kilis yimb giyinqipiyn. Bi Jiwda yand yip yomb ginuk gok kuyip tawsak ay, Jiysis nup chinqyak biynimb gok kuyip, gi timey yimb giyinqipiyn.

<sup>15</sup>Pen amiy yip ma tikak ñin ak, Gor Biyomb biynimb simb niñiy dip ak, yip dinqayn angiy niñak. Kisen yip tikey yomb gen, Gor yip simb niñiy dinq niñayak ñin ak apek, <sup>16</sup>Ñiyand Jiysis; Pol nup yomen niñrep giy, kisen biynimb Jiwda mer gok kuyip, minim tep yip ak angñirep ginqamb angiy, Ñinuk nup yip yomek niñrep ginik. Kun gek, Jiysis minim ak yergiy rek mindip angiy, biynimb gunap ma angniñnik. <sup>17</sup>Bi Jiysis minim dand amemb Jerusalem mindeyak gok kuyip, niñning ma amnik. Yikop miñmon paryomb Areybiya am mindiy, andkind ap miñmon Damaskas mindyinqipiyn. <sup>18</sup>Simiy omiñal nokom yinek, Piyta Jerusalem mindek ak niñning amiy, nund yip ñin kuñay ma mindenik; yikop ñin onep anjip piskind ak mindenik. <sup>19</sup>Pen yand bi Jiysis minim dand amemb gunap ma niñnik; Piyta yip, Jiysis numam Jemis yip kuyip nep niñnik. <sup>20</sup>Minim tiksipiyn kun biy, Gor niñmindip ak, nimbip niñind yimb aspiyn.

<sup>21</sup>Pen kisen miñmon Siyriya amiy, miñmon Siyliysiya amiy ginik. <sup>22</sup>Ñin kun ak, Jiwdiya biynimb Krays ker mindeyak miñmon sikoy keykey okok, yip miseñ ma niñyak; <sup>23</sup>yikop biynimb gunap minim yip ak ying dand amiy, bi Jiysis nup minim ak angjiwi, chinup gi timey giyingip ak, miñiy Jiysis minim tep ak biynimb okok kuyip angñirasap angey niñiy; <sup>24</sup>Gor nup yimb ak dand aranyak.

**Pol Bi Gor Minim Dand Amemb Gunap Yip Minim Ang Jimñiyak**

**2** <sup>1-2</sup>Pen mind dand amiy, simiy ak yin wanjrem piskind ak ayek, Jiwda bi gunap miñmon Antiyok nimb apiy, biynimb Jiwda mer Jiysis minim angñenik nup gosimb niñyak gok kuyip, yesek angiy angyak, “Nimb chin Jiwda kumbak tikpun rek tikiy, tap yerip yerip asikpun gok asikrep giy mey, Gor biynimb nuk yimb mindeningambim angyak.” Minim angyak kun ak niñen yipund ma gek, Gor yip gos ñek, mam Banabas yip, Taytas yip kuyip ponind Jerusalem amninuk. Amiy, biyomb Jiysis nup niñyak gok yip, am wikan bap bisgiy, kiy yerip rek angningiy angiy; kuyip angnik, “Biyimb Jiwda mer gok kuyip Jiysis minim tep ak angñimbiyn; pen Jiwda kumbak tikep minim ar ak sek, tap yerip yerip asik mosik gipay minim ak sek kuyip ma angñimbiyn angnik.” Kun angen, yip pen ma angyak.

Pen yand am kuyip niñnik ñin kun ak, am kiy yip mindiy, minim angrep ma giningambun ak; Jiwda biynimb gok ap minim yomb angey, Gor wong gipiyn ak pisnep yowningamb angiy niñnik.

<sup>3-4</sup>Bi yand Taytas, nuk Jiwda mer: bi Griyk nimb ak pen, bi Jiwda gunap Jiysis Krays binuk yimb rek ay, kapkap ap chin yip wilikiy angyak, “Taytas kumbak tikiy, chin Jiwda biynimb gipun ar ak nep ginimun angyak.” Kun angey, chin minim kun ak ang amiy apiy giy, minim yand ak niñind ayek, kumbak ma tikningamb angnuk. Pen chin Jiysis nup chingiy mindrep gipun rek niñey, kuyip tep ma gek; kirgiy, chin low keykey apun rek giyañ angiy, ap minim yesek kun ak angyak. <sup>5</sup>Yand nimbip biynimb Jiwda mer gok gos niñiy, Jiysis minim niñind yimb ak nep diningiy angiy, minim kiyk angyak ak ma nep dinuk.

<sup>6</sup>Piyta, Jemis, bi gok rek, biyomb angningambun ak pen; Gor niñek chin nep kuyip kun angningambun. Pen biyomb kun gok, biynimb gok kuyip kun kun giy angñinimin angiy, yip ma angyak. Yand Jiysis minim angñimbiyn rek niñiy angyak, “Mey angip ak angyak.” <sup>7</sup>Kiyk niñyak: Gor Piyta nup kond mindek, bi Jiysis minim dand amemb ak mindiy, Jiwda biynimb gok kuyip angñirangip rek; yip kunep kond mindek, bi minim nup dand amemb ak mindiy, biynimb Jiwda mer gok kuyip angñirapiyn. <sup>8</sup>Kun ak niñiy mey angyak, “Gor Piyta nup kond mindakniñ, Jiwda biynimb okok kuyip angñirangip rek, Pol nup kunep kond mindakniñ, am biynimb Jiwda mer gok kuyip angñirangip angyak.” <sup>9</sup>Jemis, Piyta, Jon

kuyipyakam biyomb apay ak pen; kiykyakam nep, Gor yip wong kun ak anggayek niñyak rek; wong chin ar nokom gipun angyi, Banabas chirup ñin piksakyak. Kun giy minim ang ar nokom ay angnuk, “Banabas chir biynimb Jiwda mer gok kuyip Gor minim angñiningambur; nimb Jiwda biynimb gok kuyip angñinimimb angnuk.” <sup>10</sup>Pen kiyk minim nokom bap angyi angyak, “Am miñmon kun okok tangiy, biynimb Jiysis nup dipay gok kuyip anggenimiy; biynimb simbgeprek miñmon Jiwda biy mindpay gok kuyip sakiy ma giy, kuyip maniy gunap ñiningiy angyak.” Minim angyak kun ak, yip tep gak ar ak nep angyak.

### **Pol Piyta Nup Ang Gak**

<sup>11</sup>Pen kisen miñmon Antiyok am mindonuk ñin ak, Piyta apiy, ar kun ak key gek, nup misen ang ginik. <sup>12</sup>Yenen: nuk nind biynimb Jiwda mer namb okok mindiy, biynimb Jiysis nup chingyak gok yip, tap jimñiy ñimbyingip. Pen Jemis binuk gunap Jerusalem nimb wiyak gok yip angningambay, “Yenen bi kumbak ma tikpay gok yip tap ñimbsap angningambay” angyi pirikiy, Jiwda mer gok yip tap ma ñinjak. <sup>13</sup>Kun gek, Jiwda biynimb nind jiw am miñmon kun okok mindeyak gok, yesek gak kun ak niñiy, kunep giyak. Pen mam Banabas kunep niñiy, kiyk giyak ar kun ak kindik gak.

<sup>14</sup>Pen Jiysis minim tep ak kun giy kirgeyak, biynimb gok niñmindyakniñ, Piyta nup angnik, “Nand bi Jiwda nimb ak pen, biynimb Jiwda mer gok rek mindyngipan. Pen miñiy yenen key asik ay, biynimb Jiwda mer gok, chin Jiwda kay gipun gipun rek ginimimb angyi aspan angnik?”

### **Biyimb Jiysis Nup Gosimb Niñningambay Gok Biyimb Suñ-tep Nuk Mindeningambay**

<sup>15</sup>Chin Jiwda biynimb yipund giy gok, biynimb yikop gok rek ma mindpun ak mey; <sup>16</sup>chin niñbun: low minim ar ak gon amek, Gor niñek biynimb suñ-tep nuk gok ma mindeningambun. Chin biynimb Jiysis Krays chinup nen kumak angyi, nup gosimb niñbun gok nep biynimb suñ-tep nuk gok mindpun. Pen biynimb low minim ar ak gey amningamb gok, biynimb suñ-tep yand angyi ma angningamb.

<sup>17</sup>Pen nimb gunap angningambim, “Chin Jiwda biynimb Krays chinup angyi kumak rek, suñ-tep mindonjun angyi,” low minim ar ak niñiy, tap kilrimey gipay gok kirginingambun ak; Jiwda mer gok Gor nup kirpay rek ak giningambun. Ar kun ak Krays nep gek, timey giningambun angningambim ak pen; ak mer. <sup>18</sup>Chin key Gor minim ak timbrikpun. Krays nup diy, won ak pen nup kirgiy, chin Jiwda biynimb low minim ak tip kisen giyng, tap kilrimey giyngipun ar ak amiy, minim nup ak timbrikningambun. <sup>19</sup>Yand low minim ak niñdand amiy, mindrep

ginim rek ma ayek, ar kun ak pisnep kirgiy, Jiysis nup diy mey; Gor yip tapiyn. <sup>20</sup>Gor N̄inuk yip simb niñiy kumak ak nup chingiy mey; nuk kumak ak, yand yip kumruk rek ayip. Kun ak low minim tap kilrimey ginimimb ang̃ỹng̃ipay gok kirgiy, nup chingiy mey; mindỹng̃ipiyn rek ma mindpiyn: miñiy kim yimb mindiy, nup gosimb niñỹng̃, yip gos ñimb ar ak nep gipiyn. <sup>21</sup>Pen low minim ak nep niñiy, Gor biynimb nuk mindombinup rek an̄gep, Nop an̄gek Krays chinup nen ma kumbikop. Low minim ar ak giy, Gor yip jimñiy mindonjun rek ma ayek, chinup simb niñiy, N̄inuk nup an̄gek apiy, chinup nen kumak. Kun ak yand minim tep nup chinup nen kumak ak, ma kirginingayn.

**Tap Kilrimey Giỹng̃ipay Rek Mer; Jiysis Nup Chingiy  
Mey, Gor Yip Jimñiy Mindeningambun.**

**3** <sup>1</sup>Galesiya biynimb. Nimbip sakiy ayip akan̄ yergip? Chin Jiysis Krays nup mon kiros bak biyon̄ ñan̄gbirikyak minim tep ak, an̄gñirep gon niñbik ak pen; yergek apim, “Low minim kilrimey giỹng̃ipay rek nep giy, biynimb nuk mindoningambun apim?” <sup>2</sup>Pen yand nimbip minim nokom bap an̄gn̄nsipiyn. Nimb nind yerer gem, Gor Kawnan nuk ak nimbip yokak? Low minim ak niñem nimbip ma yokak; minim tep nimbip an̄gñinuk ak nep niñem, nimbip yokak. <sup>3</sup>Gor Kawnan ak nup diy mey, biynimb suñ-tep nuk gok mindpim ak pen, miñiy sakiy ayek, chin key kilrimey giy, mindrep giningambun an̄giy gispim. <sup>4</sup>Nind Krays nup dem nimbip timey geyak, nup ma kirpik ak pen; miñiy yenen low minim ak an̄gey, minim kun ak diy, nup kirgining̃ gispim? <sup>5</sup>Yip an̄gem niñiy. Low minim ar ak gem niñiy, Gor Kawnan nuk ak yokek tap mageprek gok gipik?

<sup>6</sup>Gor basind Ebrahim nup gak rek, chinup kunep gip. Baybol buk ak tikiy an̄gyak, “Gor giningayn an̄giy an̄gayak minim ak, Ebrahim niñind an̄gip an̄giy niñek, bi suñ-tep yand an̄gip” an̄gyak.

<sup>7</sup>Kun ak niñim: biynimb kumbak tikiy, Jiwda low an̄gip an̄gip rek giy mey, Ebrahim ker mindeningambim apay gok; yesek apay. Biynimb Gor an̄gip minim ak niñiy, niñind an̄gip an̄giy dipay gok, Ebrahim ker mindpay. <sup>8</sup>Gor Ebrahim nup an̄gak, “Nand mindpan rek, kisen biynimb miñmon okok mañgiysek tep giningamb an̄gak.” Minim an̄gak kun ak, “Kisen biynimb Jiwda mer gok, Jiysis minim tep ak niñind an̄gip an̄giy diningambay ak mey; kuyip diningayn an̄giy,” an̄gak. <sup>9</sup>Kun ak biynimb minim tep nup ak niñiy, nup gosimb niñningambay gok, Ebrahim Gor nup gosimb niñiy, am nuk yip mindrep gip rek ak, am mindeningambay.

<sup>10</sup>Pen biynimb Gor low ar ak gon, chinup biynimb suñ-tep an̄giy diningamb apay gok, yiwur yomb yimb diningambay. Yenen, Baybol buk ak tikiy an̄gyak, “Biynimb Gor low minim tikyak tikyak rek mañgiysek kisen ma giningambay gok, yiwur yomb diningambay an̄gyak.”

<sup>11</sup>Pen minim bap tikiy angyak, “Biynimb yip gosimb niñbay gok nep mey, biynimb suñ-tep yand mindeningambay angyak.” Kun ak niñbun: Biynimb low minim ar ak nep niñiy gey amningamb gok, biynimb suñ-tep nuk mindey, kuyip dinimuñ rek ma ayningamb. <sup>12</sup>Biynimb, “Jiysis chinup nen kumak rek, Nop chinup diningamb angyi” niñbay gok nep, ñin ar kuyip apiyminay ak mindeningambay. Pen low minim niñiy gipay ak, Baybol buk tikiy angyak, “Gor low gok mangiysek kisen giy mey, kim amningambay angyak.” <sup>13</sup>Pen chin, Gor low minim ar ak gi mer niñiy, apyap pikiy yiwur yomb dining gon, Krays Nop Gor nup angak, “Yand tip kuyip ak diy, bi timey rek bap minden, yip mon bak biyoñ ñangbirik ayey kumiyn angyi,” kumak. Baybol buk ak tikiy angyak, “Bi mon bak biyoñ tiwningaypay gok, Gor kuyip yiwur yomb ñamb mey; kun giy kumbay angyak.” Kun ak niñbun: chin yiwur yomb dining gon, Krays tip chinup ak diy, yiwur yomb kun ak diy kumak. <sup>14</sup>Pen Krays kumak ak, biynimb Jiwda mer gok kuyip kunep dining kumak. Gor Ebrahim nup minim angay angak, “Nand mindpan ak mey, biynimb miñmon okok kuñaynep, kuyip tep giningamb angak.” Ar kun ak nep, Krays Jiysis chinup nen kumek mey; nup gosimb niñiy kond mindon, Gor Kawnan nuk ak nup yokek apiy, chinup bak ayip.

### **Gor Giningayn Angyi Angayak Minim Ak Sek, Low Minim Ak Sek**

<sup>15</sup>Mam ay sikop. Yand nimbip minim bap angyiyn. Bi gunap minim anğ ar nokom ay, apay rek nep gipay. Bi bap ap timbrikiy monmon ma giningamb. <sup>16</sup>Kun ak rek, Gor Ebrahim nup giningayn angyi angayak minim ak, kisen minim bap key ma angningamb. Pen minim angayek, Baybol buk tikyak ak, “Ñapan nip gok,” angyi ma tikyak; “Ñapan nip ak,” angyi tikyak.” Ñapan nokom angyak kun ak, Krays nup nep angyak. <sup>17</sup>Pen yand aspiyn ak: Gor Ebrahim nup giningayn angyi angayak minim ak, pisnep angay, simiy kuñaynep mindiy, low minim kisen angyak ak; yergiy minim nuk nindnimb angayak ak kirginingamb. Nuk kun ma giningamb; minim nind angak kun ak pisnep angak. <sup>18</sup>Pen basind chin Ebrahim low minim ak niñek, Gor nup dak ma angnimimb; nup simb niñiy, giningayn angyi angayak rek dak.

<sup>19-20</sup>Pen kun apiyn ak nimb angningambim, “Gor Ebrahim nup yikop dak kun ak; nuk yenen Jiwda biynimb gok kuyip, low minim ak anğñak angningambim.” Pen Gor nup giningayn angyi angayak minim ak, angak rek mindakniñ, low minim ak kisen sesek angak. Pen gak kun ak angak, “Giningayn angyi angaynik rek, Ebrahim tikek tik dand amiñ tikningamb Ni ak, kuyip angyokningayn ak pen, ñin namb biy tap siy tap timey keykey gispay rek, kuyip low minim ak angen mey; low kun gok timbrikying, Gor minim nup timbriksipun angyi, niñrep giningambay angak.”

Pen low minim ak enjol gok nep dand apiy, Mosis nup angñeyak, Mosis nund pen biynimb gok kuyip angñak. Minim chinup giniṅgayn anggiy anggayak ak, minim yomb yimb ak mey, nuk key apiy Ebrahim nup angñak.

### Low Minim Ak Chinup Gos Timund Winjikak

<sup>21</sup>Nimb gos bap niṅiy angniṅgambim, Gor chinup minim ar omiṅal angak ak; low minim angak ak dep nep; giniṅgayn anggiy anggayak minim ak dep nep angniṅgambim. Pen minim omiṅal kun ak keykey ma mindip. Biynimb suṅ-tep mindeniṅgiy anggiy low minim bap anggombikop; low ar kun ak giy kim amiy, perper mindombinup. Pen low kun ak rek bap ma angak. <sup>22</sup>Baybol buk tikyak rek nep mindip. Chin biynimb miñmon okok maṅgiysek tap siy tap timey ar ak gon gon, gach kun ak kom kom gek, key kim amjun rek ma ayip. Pen biynimb Jiysis Krays nup gosimb niṅniṅgambun gok, Gor giniṅgayn anggiy anggayak rek giy, chinup diniṅgamb.

<sup>23</sup>Pen Krays ma awak ñin ak, nup gosimb ma niṅnuk ak mey, Mosis low minim angak ak, chinup wariy rek gi kus kus gak. <sup>24</sup>Kun ak low minim ak chinup gos timund winjik dand apiy, Krays apek nup gosimb niṅon, Gor niṅek biynimb minim ma mindip gok mindpun. <sup>25</sup>Krays chinup anggiy owak rek nup gosimb niṅiy mey, kilrimey giyṅgipay low ar ak kirpun. <sup>26-27</sup>Nimb nup gosimb niṅiy mey, maṅgiysek Gor ñapan nuk mindiy, ñiṅg pikiy, nup chingiy, chech kisenimb rek ak aypim. <sup>28</sup>Kun ak Jiwda kiñiṅ ak key, Jiwda mer kiñiṅ ak key; biyn kiñiṅ ak key, bi kiñiṅ ak key ma mindpun; biynimb kalambis woṅg gipay gok key, biynimb yikop mindipay gok key ma mindpun; chin Krays Jiysis biynimb nuk mindpun rek, kiñiṅ nokom yimb mindpun. <sup>29</sup>Krays ker mindpun rek, Ebrahim biynimb kiñiṅ nuk nokom mindpun ak mey; Gor chinup Ebrahim nup giniṅgayn angak rek giniṅgamb.

### Krays Nep Gek Gor Ñapan Nuk Mindpun

**4** <sup>1</sup>Minim yand apiyn ak kun giy mindip: bi tap kuṅay mindip gok kumey, tap kiyk gok, ñapan kiyk gok kuyip anggaypay. Ñapan kun gok tap kuṅay mindip ak pen; kiyk sikoy mindey, tap kiyk ma mindip rek ayip. <sup>2</sup>Pen bi ñapan kun gok kuyip kond mindipay gok, kun kun ginimimb anggiy ang dand amiy, nop anggayak ñin ak apek nep, tap kiyk kun gok dipay. <sup>3</sup>Chin kunep Gor nup chingrep ma ginuk ñin ak, kichekiy, chipday, tap yerip yerip okok minim anggyak ak niṅiy, mindrep ma giyṅgipun. <sup>4</sup>Pen Gor key niṅayak ñin ak apek, Ñinuk nup yokek, Jiwda biyn bap nup tikak. Tikek, nuk Jiwda low minim ar ak niṅmind dand amiy, <sup>5</sup>biynimb low minim dipay gok sek di Gor yip jimñiy aṅniṅ kumak. <sup>6</sup>Nimb ñapan nuk yimb mindpim rek, Kawnan nup ak yokek apiy, nimbip bak ayip

ak mey; Gor nup Bapiy chin apim. 7Kun ak nimb biynimb Seytan nup kalambis woŋg rek giyিংgipim gok, miñiy Gor Ñapan nuk mindpim ak; Gor nimbip mindrep giyaŋ aŋgiy aŋgayak rek, mindrep giniŋgambim.

### Pol Galesiya Biynimb Kuyip Gos Miker Ayak

8Pen nind Gor nup ma chiŋgiy, tap yesek okok lotiw gi dand amiy, tap kun gok kirgiy, Gor nup gosimb niŋnimimb rek ma ayak. 9Pen miñiy Gor nup chiŋgipim. Kun ak nimb niŋiy nup ma dipik; nuk key niŋiy nimbip dak. Pen yenen andkind amiy, nind giyিংgipim rek giniŋ gispim? Gispim kun ak, tip ak kosyam mindon aŋgiy gispim. 10Per ñin yomb apay ak nep niŋiy, takin yomb apay ak nep niŋiy, pumb yombip apay ak nep niŋiy, simiy yomb apay ak nep niŋiy gipim. 11Nimbip minim tep aŋñen niŋbik ak pen; miñiy kirgipim rek ayek, nimbip gos kuŋay niŋsiyiŋ.

12Mam ay sikop. Yand nimbip simb niŋiy aspiŋ! Nind Jiwda low minim niŋyিংgipiŋ ak kirgiy, nimb yikop mindyিংgipim rek mindpiŋ ak; nimb kunep low minim kun ak kirgiy, Gor nup nokom chiŋgnimimb. Yand nimb yip mindenik ñin ak, yip direp yimb gipik. 13Nimb niŋbim, yip tap gak ak mey; miñmon nimb ak mindiy, nimbip minim tep ak aŋñinik. 14Mindrep ma ginik kun ak, yip yiruk niŋiy ma kirpik; Gor enjol bap akaŋ, Krays Jiysis nep aŋgiy dipay rek yip dipik. 15-16Yip dipik miñ ar kun ak, miñiy dam yokpim akay? Akaŋ minim niŋind aŋgnik ar ak niŋiy, miluk niŋbim? Am nimb yip mindenik ñin ak, yip simb niŋiy, windin maŋgiy nimbik gok tuŋgjiw yip ñemb rek ayek, monmon tuŋgjiw ñinimimb rek ak mindenimbik. Pen miñiy yip yenen kirpim?

17Bi nimbip timund winjikpay gok, yimb kiyk ak nep dand aranying, Pol nup kirgiyaŋ aŋgiy, nimbip per tom gipay. 18Yand nimb yip mindiy akaŋ, par okok minden, bi gunap nimbip gosimb ñiniŋgambay ak, tep giniŋgambay ak pen; yimb kiyk dand aranying, nimbip tom gipay ak, tep ma gip.

19Pen ñapan yand gok. Nimb yip am mindenik ñin ak, Krays nup chiŋgiy, nuk mindip rek mindeniŋgiy aŋgiy, biŋn gok ñapan tikniŋ gey miker yimb gip rek gak ak, miñiy yip tip ak gisap. 20Nimb yip mindembinip ak, minim akay diy aŋgnim aŋgiy, niŋbinip ak pen; par akniy mindpiŋ rek, gos niŋen tikindyowip.

### Hega Yip Sera Yip Kuyip Minim Paydoŋ Ayak

21Pen nimb low minim nep niŋjun apim gok, low minim tikyিংg aŋgyak minim ak ma niŋbim rek ayip. 22Minim kun ak tikiy aŋgyak, “Ebrahim ñi omiŋal tikak. Ñinuk bap, biŋn piñ ap biŋnuk nup woŋg giñiyিংgip ak nup diy tikak; ñinuk bap, biŋnuk yipund giy ak yip tikak. 23Biŋn woŋg giyিংgip ñi tikak ak, ñapan tikpay rek tikak; pen biŋnuk nind ak ñapan wom mindiy, Gor Ebrahim nup ñi bap tikniŋgamban aŋgiy minim aŋgayak rek, ñi ak tikak.”



<sup>24-25</sup> Pen kesim ar kun ak, minim gunap bak okok mindip. Biyn wong giñemb Hega mey, low minim rek ak; biyn Sera mey, minim giniṅgayn aṅgiy aṅgayak ak rek. Biyn Hega miñmon nuk Areybiya nimb. Miñmon Areybiya kun ak mey, nind Gor low minim ak, Mosis nup ñak miñmon sikoy Saynay dum. Pen Jiwda kiyk pernep low apay ak mey; Jerusalem miñiy mindip ak, miñmon Saynay dum rek ayip. Kiyk mey, Hega ñapan nuk gok kun gim kun gim aṅgyakniṅ, kalambis wong giyiṅgipay rek ak gipay. <sup>26</sup> Pen chin biyn Hega kind ak nimb ma mindpun. Amiy chin mey, Jerusalem, semb biyon nimb ak. Biynimb Jerusalem kun biyon nimb gok kuyip, minim sosim aṅgningiy rek ma ayip; Gor chinup minim aṅgayak rek giniṅgamb aṅgiy niṅbay rek, kuyip dip. <sup>27</sup> Kun ak rek, Baybol buk tikiy aṅgyak,

“Biyn ñapan wom ak, ñapan tikek nup tep gakniṅ, miñmiñ yimb giniṅgamb. Kiñiṅ nuk ak yomb yimb mindeniṅgambay. Pen biyn nuṅgumiy yip tangyiṅgip ak ñapan tikek, kiñiṅ yomb ma mindeniṅgambay aṅgyak.”

<sup>28</sup> Mam ay sikop. Gor Ebrahim nup, biyn nand yipund giy yimb ak, ñapan bap tikniṅgamb aṅgek, gos kun ak niṅmindi, ñinuk Aysek nup tikek, kiñiṅ yomb yimb amnak. Kun ak rek, Gor chinup diniṅgayn aṅgek, gos kun ak nep niṅmindon, chinup dek, miñiy kiñiṅ yomb yimb ak mindpun.

<sup>29</sup> Nin kun ak, basind Ebrahim ñinuk biynimb ñapan tikpay rek tikak ak tikjakiy, numam andik Gor Kawnan gek tikak ak nup miluk niṅak. Kun ak rek, miñiy biynimb Jiwda low minim niṅbay gok, chinup Jiysis nup gos niṅbun gok kunep gipay.

<sup>30</sup> Pen Baybol buk ak tikiy aṅgyak, “Biyn wong giñemb amiymiṅay ak kuyip aṅyoknimin. Biyn yipund giy diy ñi tiknak ak, tap niripapiy gok, ñi bap ma diniṅgamb aṅgyak.”

<sup>31</sup> Kun ak mam ay sikop niṅim! Chin biyn yikop ap wong giñiyiṅgip ñapan nuk rek ma mindpun; Ebrahim biynuk yipund giy diy ñapan tikak rek gok mindpun.

### Kalambis Mindonuk Krays Chinup Tuṅgasik Dak

**5** <sup>1</sup> Nind mindrep ma giy, mind dand amiy, Krays chinup nen kumek, nup diy mindrep gipun ak pen; miñiy nimbip Jiwda low minim ak tip niṅyay aṅgiy, nembnemb gi dand amjipay ak, niṅrep ginimimb.

<sup>2</sup> Yand Pol nimbip aspiyn: Gor biynimb nuk mindenjun aṅgiy, Jiwda kay minim ak diy kumbak tikniṅgambim ak; Krays nup kirginiṅgambim.

<sup>3</sup> Yand nimbip tip ak aṅgrop giniṅ gispiyn: kumbak tikep ar kun ak kindik giniṅ; Gor low minim aṅgyak aṅgyak rek giniṅgambim. <sup>4</sup> Nimb biynimb low minim niṅdon, Gor chinup diniṅgamb aṅgiy niṅbim gok; Krays nup kirgiy yap pikpim. Gos kun giy niṅbim rek, nimbip simb niṅiy

dinimuj rek ma ayip. <sup>5</sup>Pen chin biynimb Gor nup gosimb niñon, Kawnan nuk ak chinup bak ayip gok, suñ-tep yimb mindeniñgambun angyi, tep gakniñ kond mindpun. <sup>6</sup>Biynimb Krays Jiysis nup chiñgipay gok, kumbak tikyak akañ ma tikyak ak, minim ma mindip. Pen Gor nup gosimb niñiy, biynimb gok kuyip simb niñniñgambay ak; tep yimb.

<sup>7</sup>Nind tañgrep giyiñgipim; miñiy an nimbip kinjeñ tikek, minim tep ak kirgiy, minim yesek apay ak niñniñgispim? <sup>8</sup>Gor nimbip kinjeñ tikek, minim tep ak kirpim? Nuk nep mey nimbip suk angek, minim tep ak niñiy dipik. <sup>9</sup>Minim yesek apay ak ma niñnimimb. Tap yiys ak, sikoy band gunap biret sek ay danjiyey, yin tanimb. Kun ak rek nimbip giniñgamb ak mey, minim kuyip ak ma dinimimb. <sup>10</sup>Yand niñbiyn: Krays nup chiñgiy jimñiy mindpun ak mey; minim tep nimbip angnik ak, ma kirginiñgambim. Pen bi an ap angek, gosow gosow niñsipim ak, yiwur yomb yimb diniñgamb.

<sup>11</sup>Pen mam ay sikop niñim! Yip timey giyiñg nep mindpay ak, Jiysis minim anep angen yip kun gipay. Pen Jiysis minim ak angniyiñg, kumbak tikep minim ak sek apnip ak; yip timey ma gipyap. <sup>12</sup>Pen bi nimbip kumbak tiknimimb angyi, kilpul apay kun gok, walak ak sek dipyap ak tep!

<sup>13</sup>Pen mam ay sikop. Gor nimbip diyn angyi pisnep dak ak mey, low minim diy kosyam mindeyañ angyi, nimbip ma dak. Pen chin low minim sek ma apun ak niñiy, gos nimbik ak key niñiy, monmon ma ginimimb; biynimb gok kuyip simb niñiy, direp ginimimb. <sup>14</sup>Gor low minim nuk ak, mañgiysek di jimñiy minim won nokom bap angyi angak, “Nimb key wasemb aypim rek, biynimb gunap kuyip kunep wasemb aynimimb angak.” <sup>15</sup>Kun ak, nimb key niñrep ginimimb. Kanj kayn gok gipay rek miluk yapek, penpen giniñgambim ak; mañgiysek yap pikniñgambim.

### **Gos Key Niñbim Ar Ak Kirgiy, Gor Kawnan Ak Gos Niñimuj Rek Ginimimb**

<sup>16</sup>Kun ak nimbip apiyn: Gor Kawnan gos niñimb ar ak nep geniñgambim mey, gos nimb key niñiy tap siy tap timey giyiñgipim ar ak kirginiñgambim. <sup>17</sup>Gos omiñal kun ak, bap pis bap lipiñg dand amniñgamb, bap pis bap lipiñg dand amniñgamb ak mey, ginjun angyi niñniñgambim ar ak, ginimimb rek ma ayniñgamb. <sup>18</sup>Pen Gor Kawnan gos ñakniñ gon amek, low minim bap niñiy chinup kor ma giniñgamb. <sup>19</sup>Gos key niñiy gipay ar ak mey: biyn siy bi siy giy, monmon giranjiy, timey yimb giy, <sup>20</sup>tap yikop okok angniyiñy, kunj giy, koyimb pikiy, miluk niñiy, simbwur timey gek, yand key biyomb minden angyi, penpen giy, mindrep ma gipay. <sup>21</sup>Tap kiyk gok yand rek mindombikop angyi; tap yesek angniyiñy, niñ kilis niñbiy sakiy ay, timey yimb nep gipay. Yand nimbip minim angnik ak, miñiy tip ak nimbip apiyn. Biynimb kun ak rek gi mindpay gok, Gor kuyip diy ma kond mindeniñgamb.

22-23 Pen biynimb Gor Kawnan gos ñakniņ gey amimb gok, miñmiñ yimb giy; biynimb simb niņiy; biynimb gunap kuyip timey gey, pen miluk ma niņbay. Kapkap jimñiy mindiy, biynimb key okok nimb gunap yip minim sayn aņgiy, biynimb sik aņgdiiy, apay rek niņiy, kal ma jiwiy, niņrep yimb giy nokom gipay. Gipay kun ak, yenen kun gipim aņgiy, aņgniņgiy rek low bap ma mindip.

24 Biynimb Krays Jiysis nup chingipay gok, gos key niņiy monmon giyiniņipay ar ak kirpay. Miñ ar giyiniņipun kun ak, Krays yip kumimb aņgiy, Krays gos ñimb rek nep gipay. 25 Kun ak Gor Kawnan anep gek, biynimb nuk mindpun ak; tap yerip yerip giniņg, chinup gos ñakniņ nep ginjun. 26 Pen chin key yimb yomb minden aņgiy, yimb chin dand aranyiņg, penpen miluk ma niņjun.

### Penpen Direp Ginimimb

**6** 1 Mam ay sikop. Biynimb chin gunap miñ timey ar gunap geniņgiy, nimb biynimb Gor nup chingrep gipim gok, chin kunep timey ginjun rek ayip aņgiy, kuyip minim sisayn aņgiy, aņgrop gem, tip ak mindrep giniņgiy. 2 Kun ak biynimb chin gunap miker gonimuņ, kuyip simb niņiy kond mindem, mindrep giniņgiy. Giniņgambim kun ak, Krays bi biynimb simb niņimb ak, aņgak rek giniņgambim. 3 Pen biynimb gunap, biynimb yomb mindpun ak, yergiy kuyip kun ginjun aņgniņgambay ak, yesek aņgniņgambay. 4 Biynimb gunap yomb akaņ; yand yomb rek mindpiyn aņgiy gos ak ma niņnimimb. Gor yip niņek, mindrep gipiyn akaņ, mindrep ma gipiyn aņgiy gos ak niņnimimb. 5 Yenen: chin nokom nokom miker keykey mindip rek niņiy, yerer giy mindrep giniņgambun ak, key niņrep ginjun.

6 Pen biynimb Gor minim aņgñimbay gok kuyip sakiy ma giniņgiy; tap kiy mindonimuņ gok, kuyip gunap bilok ñiniņgiy.

7 Pen Gor bi sakiy aņgiy, nup monmon ma ginjun. Nup kun giniņgambun ak, chinup pen kunep giniņgamb. 8 Chin niņbun: tap yimniņgambun rek nep jakniņgamb; tap key gunap ma jakniņgamb. Kun ak gos chin key niņbun rek ginjun aņgniņgambun ak; kinjeņ timey amniņg kun aņgniņgambun. Pen Gor Kawnan gos ñimb rek ginjun aņgniņgambun ak; Gor Kawnan ak chinup gek perper mindeniņgambun. 9 Kun ak yiruk gek ma kirginjun, kilis giy gi yimiy, ñiņemb ñin ak, tep gakniņ nep ñiņniņgambun. 10 Pen tap ñiņemb kun ak wos ma gip ñin biy, biynimb Gor ker mindpay gok kuyip, direp ginjun rek ayek, direp ginjun. Pen biynimb yikop gok kunep ginjun.

### Krays Chinup Aņgiy Mon Kiros Bak Ak Kumak rek, Pol Miñmiñ Gak

11 Yand aņgen, mam bap minj biy tikip. Pen miñiy ñin maņgiy yand key tiksiypiyn ak mey, maņgiy yomb yomb rek tiksiypiyn.

12-13Tiysa nimbip minim yesek kumbak tiknimimb apay gok, kumbak kiyk key tikpay ak pen; tikiy Jiwda low gok maŋgiyseki kisen ma gipay. Kun ak kiyk kumbak tikpay ak, Jiwda gunap Krays mon bak biyoŋ kumak minim ak dipun rek, miker ma ņiniŋgiy aŋgiy tikpay. Nimbip kumbak tiknimimb apay ak, key yimb yomb diy, miŋmiŋ gun aŋgiy apay. 14Pen yand gos gunap niŋiy miŋmiŋ ma gipiyn: Jiysis yip aŋgiy mon kiros bak biyoŋ kumek, yand yip kumnik rek ayip ak niŋiy mey; miŋmiŋ gipiyn. Nuk yip kumnik kun ak, bi pisnep kumemb rek ak minden, biynimb yikop gok tap kuyip tep gip gok, yip ma gos gip. Pen biynimb kun gok yip pen niŋey, tap yikop bap rek ayek, bi pisnep kumemb rek ak mindpiyn.

15Chin kumbak tiknuk akaŋ, ma tiknuk ak, minim ma mindip. Gor gek biynimb kisenimb ay, biynimb nuk mindpun ak, tap yimb. 16Nimb biynimb kisenimb rek ay, Gor ker mindpim gok; biynimb nuk yipund giy mindpim. Kun ak Gor ņin ar ak mindiy, gos kuŋay ma niŋnimimb.

17Yand minim won nokom bap mindip ak, nimbip aŋgniŋ gispiyn. Jiysis minim tep ak aŋgen, yip pikpay kiŋowiŋ gok mindip ak; yip kisen Gor nup chiŋgrop ma gip akaŋ, monmon gip aŋgiy minim ak ma aŋgniŋgiy.

18Mam ay yand gok. Nimb Biyomb chin Krays ņin ar ak mindem, nimbip kond mindonimuŋ. Tep.